

11 NOV 2000
Mahathir-OIC
MAHATHIR MINTA PERUBAHAN DALAM OIC

Oleh: Muin Abdul Majid

DOHA, Qatar, 12 Nov (Bernama) -- Perdana Menteri Datuk Seri Dr Mahathir Mohamad meminta dilakukan perubahan dalam Pertubuhan Persidangan Islam (OIC) bagi memperkukuhkan peranannya terutama bagi menghadapi cabaran dan pembangunan.

Beliau berkata pada satu ketika nanti, kesulitan yang akan dihadapi OIC akan memaksa pertubuhan itu untuk mengariskan semula struktur dan mekanismenya.

"Untuk memastikan OIC memperbaharui kesesuaian dan keberkesannya, perubahan mesti dilakukan dengan persetujuan kerajaan-kerajaan anggota berkaitan peranan OIC, fungsi terasnya, keutamaan, apa yang dapat dilakukan secara terbaik, apa yang perlu dilakukan dengan pihak lain, dan apa yang perlu dilakukan oleh pihak lain," katanya.

Dr Mahathir berkata bagi pihak Kumpulan Asia pada majlis pembukaan sidang Kemuncak OIC kesembilan di Hotel Sheraton Doha, di sini hari ini.

Persidangan tiga hari itu yang bertemakan "Sidang Kemuncak Keamanan dan Pembangunan," dirasmikan oleh Raja Qatar Sheikh Hamad bin Khalifa Al Thani.

Dr Mahathir berkata kesulitan yang dialami oleh pertubuhan yang berpangkalan di Jeddah itu di masa lalu, kebanyakannya ialah pertindihan kepentingan, ideologi dan keinginan hegemoni negara anggota sendiri.

Beliau berkata keamanan dan pembangunan adalah cabaran berkembar ummah dan kedua-duanya melengkapi antara satu sama lain.

"Ini bermakna OIC, yang ditubuhkan untuk meningkatkan perpaduan dan kerjasama harus berusaha gigih untuk meningkatkan keamanan dan pembangunan, dan badan itu perlu memastikan budaya baru keamanan dan pembangunan dipupuk di antara negara anggota dan umat Islam secara keseluruhannya," katanya.

OIC adalah forum utama bagi perpaduan umat Islam. Malaysia adalah sebuah daripada 25 negara pengasas pertubuhan itu yang ditubuhkan pada tahun 1969. Keanggotaannya telah berkembang menjadi 56 dan isu politik yang diberikan tumpuan sebelumnya, telah diperluas hingga meliputi kerjasama ekonomi.

Negara-negara Islam, katanya, pada umumnya bergelumbang dalam kancah kemiskinan, keganasan dalaman dan konflik antara negara Islam dan negara lain.

Beliau berkata perkataan "aman" terdapat dalam sebanyak 53 ayat Al-Quran dan ia dituturkan oleh umat Islam di serata dunia.

"Oleh itu adalah bersesuaian bagi umat Islam mempromosikan keamanan sebagai cara hidup untuk mencapai pembangunan. Mencari sebab untuk bergaduh sesama sendiri dan dengan yang lain, bukanlah kehendak Islam," katanya.

-- BERNAMA

MAM RI